

TEZAU LITURGIC
5 MARTIE

ACATISTUL
SF. CUVIOS-MUCENIC
ADRIAN
DE LA
POȘEHON



MOSCOVA, 2000



Акафист

святому преподобномученику

Адриану, игумену

Пошехонскому, чудотворцу

Кондак 1

Возбранный от Царя сил Господа Иисуса, воеводо воинов духовных, и крепкий победителю врагов невидимых, Адриане преподобне, пострадавый неповинно и стяжавый дерзновение ко Господу, от всяких нас бед свободи благоприятными твоими молитвами, да славяще тя заступника нашего, хвалебно тебе зовем: Радуйся, Адриане преподобномучениче и чудотворче предивный.

Икос 1

Ангела земнаго и человека небеснаго являеши нам в житии твоём преподобне отче. Темже ангельскими глаголы подобаше восхваляти тя по достоянию, но мы любовью к тебе подвигаеми,

аще человеческими гласы со усердием сице тебе
взываем:

Радуйся, родителей благочестивых чадо
благое.

Радуйся, великаго Ростова прозябание святое.

Радуйся, Богу Отцу усыновленный в святем
крещении.

Радуйся, Богу Сыну соединивыйся во святем
причащении.

Радуйся, Бога Духа Святаго дары приемый в
святем миропомазании.

Радуйся, от пелен Богу освященный
божественных таинств благодатию.

Радуйся, пещь страстей юностных угасивый
воздержанием.

Радуйся, плоть томящую сокрушивый постом
и бдением.

Радуйся, иго Христово и бремя Его легкое
возлюбивый паче всех мирских красот.

Радуйся, горняя блага взыскати возжелевый
паче всех земных доброт.

Радуйся, земная и мимотекущая в уметы
вменивый.

Радуйся, восхождения небесная в сердце твоём совершивый.

Радуйся, Адриане преподобномучениче и чудотворче предивный.

Кондак 2

Видев суету мира сего привременнаго, преподобне отче, отечество твое и дом родителей твоих оставил еси, и во град Киев пришед, ко обители Киево-печерстей во иночество пострижен был еси, подвизався тамо с преподобными, научился еси от них благоприятно пети Богу: Аллилуиа.

Икос 2

Разум небесный тебе даровася преподобне отче, и жительствуя в обители Киево-печерстей, добродетели преподобных отец Антония и Феодосия стяжати поревновал еси, яко быти тебе воистинну наследнику преподобных, достойному похвал таковых:

Радуйся, треволнения моря житейскаго безбедно избежавый.

Радуйся, во обители Киево-печерстей пристанище спасения стяжавый.

Радуйся, иноче боголюбезный, отвергийся
воли своея всецело.

Радуйся, послушнике совершенный, веления
старцев исполнением их предваряый.

Радуйся, постнике неизнемогающий, хлебом
сухим питавайся.

Радуйся, трудолюбче благословенный,
праздность душевредную возненавидеый.

Радуйся, во смирении преуспеый.

Радуйся, в молитвах и псалмопениих
неутомимо пребывый.

Радуйся, худость ризную возлюбивый.

Радуйся, нищету вольную себе усвоивый.

Радуйся, преподобных печерских духовный
учениче.

Радуйся, добродетелей их преемниче.

Радуйся, Адриане преподобномучениче и
чудотворче предивный.

Кондак 3

Силою Божиею осененный, отче
преблаженне, стужив молвою человеческою в
обители Киево-печерстей, возжелал еси

безмолствовати в обители пустынной, и сего ради отшел еси в обитель Комельскую преподобнаго Корнилия, и тамо водворился еси, зовый в безмолвии духа Христу, Царю и Богу: Аллилуиа.

Икос 3

Имый едино попечение, преподобне отче, еже како спастися и благоугодити Христу Богу, зело возрадовался еси, видев обитель Комельскую, в пустыни вне молвы человеческия стоявшую, и уставы пустынножительныя преподобнаго Корнилия верно соблюдавшую, темже сиче обрадованному и мы сия радостная приносим песноглашения:

Радуйся, мудрый странниче, иский отечества горняго.

Радуйся, Божий избранниче, от юга на север преселивыйся во спасение.

Радуйся, жестокою стезею шествовавый подвижничества совершеннаго.

Радуйся, неослабно трудивыйся во бдениих, пениих и пощениих.

Радуйся, плоть духу всецело покоривый.

Радуйся, страсти в души твоей искоренивый.

Радуйся, словом Божиим питавайся, паче
неже брашном гиблющим.

Радуйся, слезами молитвенными питие твое
растворявай.

Радуйся, молитвенниче неусыпающий и
благоумиленный.

Радуйся, подвижниче благодатию Божиею
приосененный.

Радуйся, безмолвниче чуждый попечений
житейских.

Радуйся, безстрастия достигнувай, и
молчаливая уста имевый.

Радуйся, Адриане преподобномучениче и
чудотворче предивный.

Кондак 4

Бурное страстей море преплыл еси,
преподобне, и веянием Духа Божия в пристань
безстрастия благодатнаго достигл еси, еже видев
Комельския обители благоговейный игумен
Лаврентий, во диакона тя избра, да служиши
олтарю Господню и молитвы соборныя
возносиши за люди, зовый Богу: Аллилуиа.

Икос 4

Слышав себе похваляема от человек во обители Комельстей, смутился еси духом, преподобне отче, и тайно помышляя еси, еже безмолвствовати совершенно в пустыни, по примеру древних преподобных отец, и тамо избежати превозношения человеческого. Таковому смиренномудрию твоему мы дивящиеся, сице тебе вопием:

Радуйся, смирения высоту недосыгаемая мира сего суетою.

Радуйся, пустыни красото веселящая боголюбивыя души.

Радуйся, наследниче святых, нравы их подражавый.

Радуйся, подобниче ангелов, чистотою душевною просиявый.

Радуйся, Духа Святаго обители прекрасная.

Радуйся, таинниче Пресвятыя Троицы.

Радуйся, имже побеждаемии рыдаху души тьмы.

Радуйся, крепкий низложителю всех их искушений и привидений.

Радуйся, мужественный победителю
немошныя их силы.

Радуйся, благодатию Божию
преисполненный.

Радуйся, Адриане преподобномучениче и
чудотворче предивный.

Кондак 5

Боготечно шествовал еси, преподобне отче,
ангелом Божиим руководимый от обители
Комельския в пустыню, Богом тебе назначенную
ради подвигов духовных, и егда пришел еси,
тамо ангел, во образе старца тебе
сопутствовавший, внезапно невидим бысть, и
познав еси, яко спутник твой не человек, но
безплотный бысть, темже со трепетом воспел
еси, ангелов и человеков Творцу песнь:
Аллилуиа.

Икос 5

Видев красоту пустыни, Богом тебе
дарованная, преподобне отче, возрадовался еси
духом, и образ Пресвятыя Богородицы тамо на
древе поставив, во имя Ея освятил еси место то,
да будет Она ему покровительницею и

попечительницею навсегда, о сем похваляюще
ты сице тебе зовем:

Радуйся, усердный почитателю Пресвятыя
Богородицы.

Радуйся, присно славителю имене Ея
преблагословеннаго.

Радуйся, приемый от Нея извещение хлебом и
рыбою, пред иконою Ея обретенными, яко
благоволит Она к твоему начинанию.

Радуйся, о сем преисполненный радости
духовныя.

Радуйся, обитель иноческую во имя
Богоматере в пустыни твоей основавый.

Радуйся, иноков пустыннолюбивых в оную
собравый.

Радуйся, добрый пастырю овец словесных.

Радуйся, посту и бдению их учивый.

Радуйся, велий нареченный во Царствии
Небеснем.

Радуйся, к нему бодренно руководивый твоя
ученики.

Радуйся, назидавый их во спасение словом и
житием твоим.

Радуйся, трудивыйся неленостно во славу Божию и во спасение душ человеческих.

Радуйся, Адриане преподобномучениче и чудотворче предивный.

Кондак 6

Проповедник чудес Божиих явился еси, преподобне отче, пришед от пустыни твоя в царствующий град Москву, идеже от первосвятителя Макария с любовью восприятый, во иереа от него освящен был еси и игуменом обители твоя поставленный, со мноюю милостынею в ню возвратился еси, благодарственно взывая ко Господу: Аллилуиа.

Икос 6

Возсиял еси, преподобне отче, ближним и дальным, яко солнце пресветлое, лучами добродетелей сияющее, души и сердца верных духовно просвещающее. Темже прихождаху к тебе христоролюбивии людие, наставления и благословения от тебе ищуще, зовуще и глаголюще:

Радуйся, Евангелия Христова благовестниче.

Радуйся, апостольских преданий хранителю.

Радуйся, Православия наставниче.

Радуйся, благочестия учителю.

Радуйся, грешников обличителю.

Радуйся, кающихся с Богом примирителю.

Радуйся, пресладкий увещателю.

Радуйся, прекроткий наказателю.

Радуйся, олтаря Господня непорочный
служителю.

Радуйся, таинств Божиих достойный
совершителю.

Радуйся, молитвенней руце горе со
дерзновением воздеваый.

Радуйся, молитвы теплейшыя Господеви
возносивый.

Радуйся, Адриане преподобномучениче и
чудотворче предивный.

Кондак 7

Хотение имел еси усердное, преподобне отче,
храм Божий во имя Пресвятыя Богородицы
честнаго и славнаго Ея успения в обители твоей
построити, егоже соорудив и освятив,
безкровную жертву приносил еси в нем Богу,

достойно и праведно воспевая Ему ангельскую песнь: Аллилуиа.

Икос 7

Новый преподобномученик в земли Российстей явился еси преподобне отче, неповинно пострадав от злобных разбойник, на обитель твою нападших и тя мученически истязавших, ножами бо тело твое изранивше, огнем раны твоя опаляху, таже к конем тя привязавше, по земли влачиша и горцей смерти тя предаша, еже мы воспоминающе, сиче тебе вопием:

Радуйся, многотерпеливый страстотерпче.

Радуйся, мужественный страдальче.

Радуйся, кротко и незлобиво мучение лютое претерпевый.

Радуйся, за мучивших тя Бога моливый.

Радуйся, ножами уязвляемый и огнем опаляемый не возстенавый.

Радуйся, молитвенно о помощи к Богу вопиявый.

Радуйся, мученическую смерть мирно восприявый.

Радуйся, святую душу твою, конми по земли влачимый, Господеви предавый.

Радуйся, житие земное доблественне скончавый.

Радуйся, венец нетленный от Господа получивый.

Радуйся, яко прочее не коснется тебе ни болезнь, ни мука.

Радуйся, яко вечно радуешься со святыми.

Радуйся, Адриане преподобномучениче и чудотворче предивный.

Кондак 8

Странное и преславное чудо яви Господь над мощами твоими, преподобне отче, разбойники из обители твоея увезенными и в пустыни безвестне в земли сокровенными, древо чудотворное над ними возрасте, егоже ветви и плоды исцеляху всякия болезни в людех, иже молящися славляху Бога и вопияху Ему: Аллилуиа.

Икос 8

Весь народ недоумеваше, откуда древу бездушному таковая благодать целебная дадесе,

дондеже по смотрению Божию открыся, яко у
корней сего древа святых мощи твоя почиваху,
многострадальный угодниче Божий,
ублажаемый от верных званием таковыми:

Радуйся, чудес пучино Богом излианная.

Радуйся, целебниче благий недугов
человеческих.

Радуйся, древо сладкоплодовитое, имже
напитахся вернии.

Радуйся, древо благосеннолиственное, имже
покрываются мнози.

Радуйся, искавшим тя неявленный.

Радуйся, неведавшим тя открытый.

Радуйся, сокровище драгое в пустыни
сокровенное.

Радуйся, бисере многоценный от недр земных
возсиявый.

Радуйся, обретением мощей твоих обитель
твою духовне возвеселивый.

Радуйся, сиротство ея утешивый.

Радуйся, лишение ея благодатно
восполнивый.

Радуйся, ближним и дальним милость твою
целебную всещедро даровавший.

Радуйся, Адриане преподобномучениче и
чудотворче предивный.

Кондак 9

Вси иноцы обители твоея преподобне отче,
возвеселишася радостию святою егда честныя
мощи твоя от пустыни со славою и
псалмопением во оную принесошася, и во храме
Богоматере благолепно положишася, ихже
пренесение светло празднующе, хвалебно
вопяху ко Господу: Аллилуиа.

Икос 9

Ветийство наше песненное не довлет к
достойному прославлению твоих многих чудес,
преподобномучениче Адриане приснопамятне:
обаче ты яко благ и милосерд не возгнушайся
наших недовлеющих похвал, но милостивно
услыши с любовью тебе зовущих:

Радуйся, новый российский целебниче.

Радуйся, всех преподобных российских
сподвижниче.

Радуйся, Антониа Печерскаго подражателю.

Радуйся, Феодосиа Печерскаго
соревнователю.

Радуйся, Сергию Радонежскому равночестне.

Радуйся, Варлааму Хутынскому единоправне.

Радуйся, подобне Аврамию Ростовскому
невидимаго Велеса сокрушивый.

Радуйся, подобне Корнилию Комельскому
пустыню духовне у плодоносивый.

Радуйся, Макариа Желтоводскаго
великодушие стяжавый.

Радуйся, Димитриа Прилуцкаго благодатныя
дары получивый.

Радуйся, Зосиме Соловецкому нравом
пустыннолюбным соравнивыйся.

Радуйся, Савватию Соловецкому упованием
на Бога уподобивыйся.

Радуйся, Адриане преподобномучениче и
чудотворче предивный.

Кондак 10

Спасение вечное унаследовал еси, угодниче
Божий, и за страдания временная получил еси
блаженство вечное, обитаеши бо со ангелы и
всеми святыми во славе невечерней, и сладце

поеши во гласе радования и веселия победную
песнь Христу Богу: Аллилуиа.

Икос 10

Стена еси защищения верным, чудотворче
святой, и всем с любовью совершающим
память твою заступник и покровитель бываеши,
недужныя исцеляеши, скорбящыя утешаеши, и
всех подвизаеши звати тебе:

Радуйся, светилниче пресветлый, мрак
страстей прогоняющий.

Радуйся, источниче многоводный исцелений
благодатных.

Радуйся, реко приснотекущая чудес.

Радуйся, цвете нетления, святую российскую
церковь облагоухавый.

Радуйся, милования и врачевания подателю
всещедрый.

Радуйся, любви и сострадания проявителю
всебогатый.

Радуйся, земнородным заступниче небесный.

Радуйся, православным предстателю
нелестный.

Радуйся, пустыни прекрасное прозябение.

Радуйся, обители твоея присное радование.

Радуйся, столпе православия непоколебимый.

Радуйся, покрове, не крыющийся от нашего притекания.

Радуйся, Адриане преподобномучениче и чудотворче предивный.

Кондак 11

Пение хвалебное тебе приносим, угодниче Божий, предивный в чудесех, и с любовью совершаем пресветлое торжество твоего мученического убиения и преславного мощей твоих обретения и пренесения, радуящеся о твоём прославлении в лице святых и зовуще Богу дивно в тебе прославльшемся: Аллилуиа.

Икос 11

Светоподательный светильник Божией благодати являешися нам, преподобномучениче преблаженне, во мнозех и предивных твоих чудесех, яже удостоверяют нас в твоей святости и близости ко Господу, Емуже помолися за ны грешныя, усердием сие тебе зовущия:

Радуйся, алавастре многоцелебный на всяк недуг врачевство содержащий.

Радуйся, маслино благоплодная, елей Божией благодати обильно нам источающая.

Радуйся, благоуханный кипарисе, зной страстей нам прохлаждающий.

Радуйся, крине пустынный, духовне нас увеселяющий.

Радуйся, доле земли Российския, яко никогдаже обуяет.

Радуйся, светлое зеркало добродетелей.

Радуйся, правило иноческаго богоугоднаго жития.

Радуйся, образе терпения и незлобия.

Радуйся, кроткий Христов последователю.

Радуйся, приискренний Иисусов любителю.

Радуйся, сыне благословенный Отца Небеснаго.

Радуйся, друже святых, присный Богу.

Радуйся, Адриане преподобномучениче и чудотворче предивный.

Кондак 12

Благодати причастная рака святых и
многоцелебных мощей твоих, Адриане

преблаженне, яко новая купель Силоамская нам является, к нейже приходяще недужнии здрави возвращаются, и всяким болезнем исцеление от нея подается твоими молитвами ко Господу, чудотворче святой, Емуже поем о тебе хвалебную песнь: Аллилуиа.

Икос 12

Поюще многая и преславная чудотворения твоя, Адриане преподобне, хвалим, славим и величаем прославльшаго тя и дивнаго во святых своих Бога нашего, Иже дарова нам тебе целebника благодатнаго и заступника милостиваго, тебе же от любве сердечныя сице вопием:

Радуйся, Пресвятая Троицы верный угодниче.

Радуйся, Пресвятая Богородицы изрядный слуго.

Радуйся, ангельских воинств собеседниче.

Радуйся, предтечи пустыннолюбивый подражателю.

Радуйся, пророков Божиих единоревнителю.

Радуйся, апостолов Христовых последователю.

Радуйся, мученических полков украшение.

Радуйся, велий в лице преподобных.

Радуйся, праведных сонаследниче.

Радуйся, всех святых сожителю.

Радуйся, тела наша безмездне врачуяй.

Радуйся, души наша молитвами твоими спасаай.

Радуйся, Адриане преподобномучениче и чудотворче предивный.

Кондак 13

О великий угодниче Божий преподобномучениче и чудотворче Адриане! Нынешнее наше моление милостивно приемь, моли Троидинаго Бога избавити нас от бед временных и вечных, да избавльшися мучений адских молитвами твоими блаженство райское унаследуем и со святыми воспоем Ему песнь хвалы и благодарения: Аллилуиа.

Кондак сей глаголи трижды, таже икос 1-й и кондак 1-й.

Молитва 1

О священная и многострадальная главо, земный ангеле и небесный человеце, преподобномучениче и чудотворче Адриане! Припадаем к тебе с верою и любовью и молим ти ся прилежно, яви нам смиренным и грешным святое твое заступление; се бо грех ради наших не имамы свободы чад Божиих, просити о потребах наших Господа и Владыку нашего, но тебе молитвенника благоприятнаго к Нему предлагаем и просим тя со усердием многим: испроси нам у благости Его благопотребныя дары душам и телесем нашим: веру праву, надежду спасения несумненну, любовь ко всем нелицемерну, в искушениях мужество, в злостраданиих терпение, в молитвах постоянство, душ и телес здравие, земли плодоносие, воздуха благорастворение, житейских потреб довольство, мирное и безмятежное житие, благу христьянскую кончину, и добрый ответ на Страшнем Суде Христове. Испроси, угодниче Божий, у Царя небесе и земли, страждущую страну Российскую от лютых безбожников и власти их да свободит, и да возставит престол православных царей; верных рабов Его, в скорби и печали день и

нощъ вопиющихъ къ Нему, многоболезный вопль да услышитъ и да изведетъ отъ погибели животъ нашъ. Не забуди, святче Божий, и обитель твою, тобою созданную и присно тя чтущую, но соблюди ю и вся живущыя и подвижающыяся в ней и на поклонение в ню приходящыя невредимы отъ искушений диавольскихъ и всякаго зла. Ей, преподобномучениче святыи! Не лиши насъ помощи твоея небесныя, но молитвами твоими всехъ насъ приведи в пристанище спасения, и наследники яви насъ всесветлаго царствия Христова, да поемъ и славим неизреченныя щедроты человеколюбца Бога Отца и Сына и Святаго Духа, и твое святое заступление, во веки вековъ. Аминь.

Молитва 2

Преподобне отче преблаженне Адриане, первейший пустыни сея просветителю и монашескаго жития в ней основателю, пришедый в ню со ангеломъ Господнимъ, и освятивый ю Пресвятыя Богородицы чудотворною иконою и благодатию, в нейже и явился еси подвиги твоими пресветлое целомудрия зеркало, прекрасный смиренномудрия образе, одушевленный

терпения столпе, известное воздержания правило и нищеты любителю, и всесовершенный Христов угодниче, се мы грешнии, смиренно припадающе молим тя: приими моления наша и вознеси я на жертвенник благоутробия Божия. Испроси нам предстательством твоим у всемилостиваго Бога нашего: мир миру, Церкви святей утверждение, согласие в вере, преспеяние во благочестии и добродетелех христианских, да достойни явимся щедрот и милостей благосерднаго Бога: паству твою духовную и обитель твою святую, непрестанно управляти жезлом мудрости духовныя: подвижающимся помози, разслабленныя укрепи, падающыя возстави, споспеши всем нам иго Христово в терпении и благодушии понести, и всех нас управи в мире и в покаянии скончати живот наш и со упованием спасения преселитися в блаженная недра Авраамова, идеже ты радостно по трудех земных опочиваеши, прославляя со всеми святыми Триипостаснаго Бога, Отца и Сына, и Святаго Духа, в безконечныя веки веков. Аминь.

Молитва 3

О великий угодниче Божий преподобномучениче и чудотворче Адриане! Призри на нас грешных, к честней раце святых и многоцелебных мощей твоих припадающих и просящих твоего заступления и помощи, скорбь нас обдержит и не имамы помощи и утешения в мире сем скоротечнем, но к тебе прибегаем, многострадальный угодниче Божий, яко сострадати нам могущему и велие дерзновение стяжавшему ко Христу Богу, к Немуже многомощен предстатель еси о всех с верою к тебе прибегающих и твоего заступления и помощи просящих. Моли убо человеколюбца Господа, яко да простив нам безчисленная наша прегрешения, не отвратит милость свою от нас, но, яко благ и милосерд, да явит нам безконечное свое человеколюбие, и в бедах и напастех всеильную свою помощь нам да подаст. Ей, угодниче Божий, воздвигни преподобней руце твои и моли Христа Бога, Емуже верно послужил еси, да не отринет молений наших недостойнства ради нашего, но да явит нам благовременне помощь и милость свою, да славим Его щедроты и твое святое

предстательство ныне, и присно, и во веки веков. Аминь.

